

第二篇 工作概況

余赴羅布淖爾考察，前後共二次。第一次在民國十九年春季。余等在吐魯番工作完後，於四月八日發自魯克沁南之得格爾，穿經庫魯克山，六日程抵達羅布淖爾海邊。工作二十餘日；（詳見下文。）五月六日，返魯克沁。往返共計一月。第二次為民國二十三年，亦為春季。代表教育部赴新疆考察教育及文化。阻於兵事，乃南行，入羅布淖爾考察。五月初，仍出發自得格爾、至庫魯克山中之英都爾庫什，改依西一道而至庫魯克河畔。往返共月餘。余兩次旅行，時間均甚短促，踏查未周。但吾人亦感幸運，時間雖短，而收獲尚佳。尤其在漢代烽火臺遺址中之發見，為吾人意外之收穫；至於古塚及石器，猶其次也。今分石器，古塚，古代遺址三項，敘述於下。

第一章 石器遺址

一、英都爾庫什 此地在庫魯克山中，北距得格爾約二百里，南距阿提米西布拉克約百五十餘里，當得格爾與羅布淖爾中間。凡由魯克沁直穿庫魯克山而至羅布淖爾，必經過此地。蓋以南以北，均無良好水草，此地泉水雖鹹，尚可為駝馬飲料也。（參看附圖七：羅布淖爾第二次考查路線圖。）在英都爾庫什山溝之南口，突起平原，沙磧彌漫，檉柳叢生，獵戶以此地為休憩之所；並疊石塊及檉柳為室，以避風雨。有井一，位於蘆葦叢中，胡桐交槎，風景頗優，同人譽為荒山樂園。而遠古人類之遺址，亦分布於附近，蓋求安居之念，古今人相差不甚遠也。

余等於四月八日，由得格爾南行，穿庫魯克山，十日抵英都爾庫什，時已下午七時矣。次早巡視有沙磧之區，在沙阜附近，檢拾石刃片數十件，石核數件，多以石英碧玉為質，要皆取材於附近山中岩石也。停留一日。第二次旅行新疆時，復經行此地，停留二日，又在溝旁拾石刃片數十件。兩次共拾一百二十餘件。並在沙阜旁拾打製不規則之石斧二件，一橫形；均為石英質，（圖版一：圖²，3。）與石刃片同出土，其為一時代之產物無